



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

Tir Yimym

tiryimym@aolima

tir yimym

TAPAK 8

Ato kilonser Modi-i Manipur atema minute 2 dang jembu: Rahul Gandhi

FIFA Women's World Cup: Sweden aser Spain semi-final tongogo



FIFA WOMEN'S WORLD CUP

AU 20 NZ 23

VOL. XX NO. 300 (ADOK 300) DIMAPUR

KÜPTOKNÜ (SATURDAY)

LUROI (AUGUST) 12, 2023

₹ 5.00

Centre-i Kuki telungpurtem den ajuruteptsü

Imphal, August 11, 2023 (Agencies): India sorkari Manipur nung Kuki telungpur telok ana den ajurutepa senden amentsü akok ta osang angazüker.

August 17 nü India sorkari Kuki National Organization (KNO) aser United People's Front (UPF) nungi teshimtet nübotem den senden amentsü.

Centre sorkar tenüing nung AK

Mishra adentsü aser iba ya India sorkar o Kuki teloktem tsüingda olemtep tanabuba shilem asütsü.

Kuki telungpur telok anaprongi suspension of operation (SoO) agreement kübok takhangba onüktem benoka senden nung jembütsü.

Iba senden nungsa Manipur nung lisopur kintemi 'separate administration' akhangba benoka jembütsü akok.

NP-i Arms Act atema nisung 3, drugs atema 35 apu

Dimapur, August 11, 2023 (DIPR): Nagaland Police-i district aika nung bushitepa aodang prangpong-injang, drugs aser ozüing alema inyaksangshiba maparen aika putetogo.

Iba mapang Nagaland Police-i Arms Act kübok Dimapur nung ken o pezü benok aser iba dak sendakba nung nisung 4 puogo. Parnok ket nung ozüinggi memelaba prangpong-injang aliba putet.

Maneni, kasa mapang tsüingda Mokochung, Wokha, Zunheboto, Kiphire, Tuensang aser Mon district tem nung Narcotic Drugs and Psychotropic Substances (NDPS) Act kübok ken o 25 benok.

Police-i brown sugar, heroin, prescription medications aser cough syrup apu aser item ken o dak sendakba nung nisung 35 puogo.

Kuki MLA 10-i MHA dang nungi telangzüba meshir

Imphal, August 11, 2023 (Agencies): Manipur nung Kuki-Zomi-Hmar MLA 10-i Union Home Ministry dangi nungi telangzüba meshiogo.

MHA-i tawa tu Myanmar nungi ozüing alema arurtem aser parnoki village defense nung shilem agiba indang shia liasü.

Iba atema Kuki-Zomi-Hmar MLA temi Union Home Ministry dang Myanmar nungi ozüing alema arurtem indang osang tejangja meshiogo.

Ozüing alema arurtemi Kuki-Zo-Hmar yimtsüingtem Manipur Police-i anir Meitei telungpurtem anema kümzüka ayuba kulitem meshir ta MLA temi MHA dang shiogo.

2021 kum Myanmar

sepaitemi sorkar atsüingdokba sülen nisungtem ozüing alema Manipur-i aruba ajanga tang Kuki-Zomi-Hmar nung samatsütsü meranger ta Parliament nung Union Home Minister-i ashi.

Pai iba olen jembiba ajanga onok temulung mesüingjemeteter aser iba jagi onok külemi ola adoker ta Kuki-Zomi-Hmar MLA 10-i külem sangdong ka nung ashi.

Parnokisa Solicitor General dang tasürtem rongnung ozüing alema arurtem aliba kuli agütsütsü tetuyuba agütsüogo.

Item kuli ya magütsütetra okadak aser linük dang yimjak nung tatok meshitsüla ta MLA temisa metetdaksüogo.

Kohima nung pharmacy aser medical store mita ao



Kohima District Level NARCO Coordination Centre (NCORD) Committee-i pharmacy ka nung CCTV Cameras enokba repringdanga aodang agiba noksa ka angur.

Dimapur, August 11, 2023 (TYO): Kohima District Level NARCO Coordination Centre (NCORD) Committee-i Kohima nung aliba pharmacy tem nung CCTV Cameras enokba indang verification drive ka agiogo.

Kohima Deputy Commissioner-i April 19, 2023 nü pharmacy aser medical store ajak nung CCTV cameras (tema aser telung) enoktsü tetuyuba agütsüba sülen Kohima NCORD-

i iba mapa inyak.

Parnoki August nungi 10, 2023 tashi iba mapa inyaka liasü aser luden nung District Administration, Kohima Police aser Medical Department nungi teshimtet nübotem aden.

Kohima nung aliba pharmacy aser medical store ajaki iba tetuyuba sülen anidaktsüla aser tashi mangartem ozüing tapet agi merenshitsü ta NCORD Committee-i metetdaksüogo.

Dimapur nung poultry products mangutsü akok



File Photo

Dimapur, August 11, 2023 (TYO): Karbi Anglong nung an shishilembaba dak sendakba nung ozüinggi memelaba syndicate ka tentetba ajanga August 10 nungi Nagaland-i an bener marur.

"Anogoshia Karbi Anglong nungi Nagaland-i poultry

products seret 45,000 nungi 50,000 tashi bener arur. Ajisüaka Karbi Anglong nung syndicate ajanga poultry items seret shia nung Rs. 30 taa meshir aser iba ajanga Nagaland nung shishilembartem timtemer" ta Poultry Union Dimapur president Tiameren-i ashi.

Iba jagi iba ken o tangatettep kati maru tashi Karbi Anglong nungi poultry items bener marutsü lemtet, ta pai ashi.

August 10 nungi Dimapur aser Chümoukedima, Niuland aser Kohima nung poultry items shishilembaba dokan ajak shibangogo anunggi nübortemi timtem arema atatsü mepishir ta Tiameren-i ashi.

Dimapur nung aliba Nagaland Gate nung ketdangsürtem aser volunteers-i poultry bener aruba garitem mita repringdar, ta paisa ashi.

Poultry Union Dimapur (PUD)-i Commissioner of Police, Dimapur tsüingdang iba atema ken o ka benokogo aser osang angazükba agi iba osanggi Karbi Anglong district administration dangi benogo.

AKM-i moko ayokertem aser chiyungtsü yanglurtem dang tuyur

Dimapur, August 11, 2023 (TYO): Ao Kaketshir Mungdang (AKM)-i shisaliok rejutem anasa moko ayokba dokantem aser Food Business Operators nem tetuyuba kar agütsüogo.

Mokokchung district kübok shisaliok rejutem anasa metre 100 telongtet nung aliba dokantem nung moko mayoktsü metetdaksür. Iba ya COPTA Act 2003 section 6B nung lateta lir aser tashi mangartem dak ozüing tapet agi merenshitsü ta

AKM-i sangdong ka nung metetdaksüogo.

Maneni, Food Manufacture and Food Business Operators (FBO) kari chiyungtsü yangluba anogo aser chiyungtsü nung enokba osang kecha mali yokyayokjiba osang angazüker. Iba ya talisa kidang chiyungtsü yanglurtem aser bakery tem lir ta AKM-i sangdong ka nung ashi.

Chiyungtsü yangluba anogo aser chiyungtsü nung enokba osang maliba ajanga tachirtem

temang nung timtem adoktsü aser iba ya Food Safety tamendakdak anema lir. Anunggi chiyungtsü yangluba anogo, liwatsü anogo den chiyungtsü nung enokba osang tejangja zülur ang chiyungtsütem ayoktsüla. Anunggi Chief Medical Officer(CMO) Mokokchung-i tetuyuba agütsüba ama chiyungtsü yanglurtem aser bakery temi labeling standards amshitsü nenshir, ta AKM-isa metetdaksüogo.

Supreme Court-i ita 2 tsüingda Manipur osang meshir

New Delhi, August 11, 2023 (Agencies): Supreme Court-i Manipur nung ozüing alema inyaksangshiba dak sendakba ken o tem bushisüingdangertem dang nung progress report meshiogo.

Supreme Court-i taoba Maharashtra DGP Dattatray Padsalgikar dang ita ana tsüingda progress report agütsütsü tetuyuba agütsüogo. Manipur nung kin o kin tsüingda raradang atalokba ken o tem bushisüingdang asütsü atema SC-i pa shim.

Maneni, Supreme Court-isa

Manipur nung nübortem timtemba asadangtsü atema taoba high court judge asem adenba luden ka shimogo. Parnok danga ita ana tsüingda progress report ka agütsütsü shiogo.

Chief justice of India (CJ) DY Chandrachud-i anir justice JB Pardiwala aser justice Manoj Misra nung adenba Supreme Court bench-i item tetuyuba agütsü.

"Tarutsü nung nüngdakba mapang Manipur nungi ken o tem belena angatsü atema tetuyuba agütsütsü" ta parnokisa ashi.

Taoba nung SC-i Centre, Manipur sorkar aser investigation agencies aija liasü. Manipur nung ozüing alema inyaksangshiba anentsü meranga Supreme Court-i taoba mapang taoba high court judge asem adenba luden ka tenteta liasü.

Iba luden nung züingsemtemji- justice Gita Mittal (taoba Jammu & Kashmir high court CJ), justice Shalini Phansalkar Joshi (taoba Bombay high court judge) aser justice Asha Menon (taoba Delhi high court judge) lir.

Amit Shah-i Lok Sabha nung bill 3 benok

New Delhi, August 11, 2023, (Agencies): Parliament monsoon session tembangba anogo nung Union Home Minister Amit Shah-i Lok Sabha nung tongtipang bill 3 benok.

Tanü Amit Shah-i Lok Sabha nung Bharatiya Nagarik Suraksha Sanhita 2023,

Bharatiya Nyaya Sanhita 2023 aser Bharatiya Sakshya Bill 2023 benok aser repringshimtsü atema Standing Committee dangi abener ta metetdaksü.

Bharatiya Nyaya Sanhita 2023 ajanga IPC 1860, Nagrik Suraksha Sanhita 2023 ajanga Criminal Procedure Code aser

Bharatiya Sakshya Bill 2023 ajanga Indian Evidence Act, 1872 melentsü.

Bill asem ya temrenshitsü agütsütsü atema masü saka temeten agütsütsü atema lir aser nisung aika den asüingdangtepa yangluba sülen ang benoker, ta Union Home Minister-isa ashi.

MKG DC-i 77buba I Day anogomung indang metetdaksü

Dimapur, Luroi/August 11 (TYO): Mokokchung Deputy Commissioner (DC) Thsuvisie Poji-i sangdong ka ajanga Mokokchung district kübok office tekolaktem aser staff tem dang taruba 77buba Independence Day anogomung indang metetdaksü.

August 15 nü Imkongmeren Sports Complex, Mokokchung nung Independence Day sentong ya anepdang 8:40 ako nung tenzüksü. Ken o dak sendaka alir ajak dang iba sentong nung tamakok maludaksüi arua shilem agitsü DC-isa metetdaksüogo.

Iba den bendenloksema District tekolak ajak dang pei department indang attendance

sheets, sentong tembangba sülen Rostrum tesülen attendance in charges ket nungi meshitsü metetdaksüogo. Iba attendance sheets ya sentong nung shilem magirtem anema jenjang tapet agitsü atema Sorkar dangi abentsü.

Kasa mapang nung Mokokchung DC-isa, Ungma, Mokokchung, Chuchuyimpang, aser Khensa densema yimtsüing balala nungi Village Council züngsem, GB Union, Mokokchung Town GB, Mokokchung jila kübok kiyong 18 nungi lenirtem aser jila nung aliba nüburtem dang Independence Day sentong nung arua shilem agitsü jaokogo.

Aongza Ward Mkg. nung aliba Jio tower generator nung mi adoka rongtok



Aongza ward nung aliba Jio Tower indang generator mokozü adoka arongba mapang nung tangokba noksa.

Mokokchung, Luroi/August 11 (TYO): Aongza Ward Mokokchung nung August 11 anepdang 6:30 ako meta Jio tower nung amshiba generator nung mi adoka iba generator-ji rongtok.

Jio Tower koba Aongza Ward nung yanglua lir iba nung amshiba generator nung mi adoker arongba temeket alirtemi iba miji remsep, saka iba miji mapang shitak nung meremseptet asübo tower nungji mi tulu adoka teraksa aser lendong tulu ajurula. Miji remseptsü asoshi Fire service ajatsü jembiba mapang tia ka-a nüburtemi miji remsepteta liasü.

Aongza Ward Chairman-i ashiba agi iba tower ya aritepa dang kangasa seplepa yanglua amenokba ajanga tower noktaka aliba aliji anensar lir aser ibaji ajanga tower telungi aitsü yangluba kishiji dena meshibangteti lir.

Item mapa shitak masübaji reprangteta Aongza Ward yimden-i company dangia iba

mapaji inyakshitsü asoshi anaben tashi tezüluba nung agutsüogo saka tanu tashi kecha meinyaki lir. Timtem aika ajurur asünung nisung aliba tesem nung iba ama tower ya mayutsüla, light maruba mapang balaka temeket nung alirtem talisa kaketshirtem lesson azüngba mapang generator ola tulu adokba ajanga kanga dang küm aika timtemdarta Aongza Ward Chairman-isa ashi.

Iba tower nung Jio company-pur maparen aika inyaksü alibatem taoba mapang tezüluba agutsüba meinyakba ajanga meinyakdaksüi songtema arur saka parnoki kecha meinyaker, tanep generator nung mi adokbajia anogo 3,4 tejaklen generator nung aliba fan raksar yanglutsü bener aoba temelen meinoki toktsüba ajanga lir, anungji Jio company puri kanga tim mesüi inyakogota Aongza Ward Chairman-isa Tir Yimyim osang zülur den jembidang metedaksü.

Kohima DC-i ketdangsürtem dang I Day sentong nung shilem agitsü ajungshi

Dimapur, Luroi/August 11 (TYO): Kohima Deputy Commissioner, Shanavas C, IAS-i sangdong ka ajanga Kohima Headquarters nung amenoka aliba office tekolak ajak aser Kohima Sadar (Urban & Rural) kübok Gaon

Bura ajak dang August 15 nü taruba 77buba Independence Day sentong nung tamakok maludaksüi arua shilem agitsü metetdaksüogo. Iba sentong ya Nagaland Civil Secretariat Plaza nung

Nagaland Dy. CMY Patton-i VVIP Guest House ka semzüksü



Dimapur, Luroi/August 11 (TYO): Nagaland Deputy Chief Minister in-charge of Home & Border Affairs, Y Patton-i Hokulbarnü Chümoukedima nung VVIP Guest House ka semzükja liasü.

Iba ki ya State Plan kübok sen crore 7.37 agi yangluba lir.

Iba ki semzüksüdang Patton-i ashiba agi, ibai guest house semzükba kisüing masü saka asenoki ochishia, nendaka agüja inyakba nung alizüng ka

atongba aser state nung ki o jen yangluba maparen maneni inyakba benjong ka lir.

Iba Guest House ya dangalen nungi aruba VVIPs tem anenzüksü asoshi lir, ta pai ashi.

Mapang talangka lir iba facility ngutetba ya Nagaland state aser talisa police department asoshi tejak tentetba mapang lir, ta pai ashi.

Küm aika asen state nung dangalen nungi arur tejangja aser tongtipang nisungtem

anenzüksü asoshi ki o jen tajung meliasü, ta pai ashi.

State nung ki o jen balala yanglutsü asoshi Ministry of Home Affairs ajanga nungdakba sen teyari agütsüba atema Deputy Chief Minister-i pelaba lemsatepa liasü.

Nagaland Chief Minister Neiphiu Rio lenisüba kübok sorkari Nagaland nung aliba nüburtem asoshi temelenshi aser ki o jen tsütsü terenlok bener arutsür, ta Patton-isa ashi.

Forest Conservation Act 2023 nung timtem lir: NPCC

Dimapur, Luroi/August 11 (TYO): Taoba hopta Lok Sabha aser Rajya Sabha nung agizükba The Amendment of Forest Conservation Act 2023 ya Nagaland state asoshi timtem lir, ta NPCC tir, S. Supongmeren Jamir ajanga sangdong ka nung ashi.

Nagaland Community Conserved Area Forum (NCCAF) ajanga ashiba agi Nagaland nung 'World top biodiversity hotspots' indang Community Conserved Areas ya 407 lir. Iba dak sendakba nung Nagaland nung 'special provision and safeguards' lir.

Ali aser yangji aliba rongsen

dak sendakba nung Naga nung customary constitutional aser legal provisions balala yanglua lir aser item nung arem aser arem nungi adokba osettsüset densema lir, ta sangdong ajanga ashi.

Nagaland aser yangji aliba ali dak sendakba nung Bengal Eastern Frontier Regulation 1873, Nagaland Land and Revenue Regulation (Amendment Act) 1987, Nagaland Village and Area Council Act 1979 aser Nagaland Land Requisition and Acquisition Act 1965 renema lir.

Item ajakji yutsür Constitution of India indang

Article 371 (1) Part XXI (13th Amendment) Act 1962 nung constitution nung aliba aser Parliament indang act kecha agia Nagaland nung aliba ali aser yangji aliba rongsen nung mokongshitsü shia lir.

Item provisions ya liaka Nagaland Legislative Assembly ajanga Nagaland nung Forest Conservation Act 2023 mamshitsü pangzüing ka renemtsüla, ta ashi.

Anungji Nagaland state wazüka ayutsü mechi Chief Minister aser NLA Speaker dang pangzüing tajung ka yanglua ayutsü ajungshir, ta NPCC tir sangdong ajangasa ashi.

Team Better Dimapur-i yimti müreka ayutsü awareness tenzük

Dimapur, Luroi/August 11 (TYO): Dimapur yimti janareja nungi jenbua ayutsü nükjidong nung Team Better Dimapur ajanga Dimapur Municipal Council den lungiemer "Let's Keep Our City Clean" omen nung ajemdaker awareness campaign ka Hokulbarnü tenzüka liasü.

Yimti müreka ayutsü nüngdakba indang awareness agütsütsü nükjidong nung iba sentong ya ayongzük, ta Team Better Dimapur tir Mhonjan Humtsoe-i metetdaksü.

Iba sentong ya küm tepiyong

agitsü aser parnoki school, college aser tekülem ki tem semdanga awareness agütsütsü.

Iba sentong nung DMC Administrator, W Manpai Phom ajanga ashiba agi, yimti müreka ayutsü asoshi mera agitsü kanga tongtipang aser asenoki tilatiba nungi metenzük tashi sentong dang ayongzükba agibo temelenshi marutsü.

Dimapur nung anepdang 5:00 ako nungi 8:00 ako tashi jana bendenba nung kangabo takok mangur, anungji anogo tepiyong jana bendentetsüsa gari tila amshitsü sentong lir, ta

pai ashi.

Tzünglu sashia aruba mapang tzü tenokdangba makai ayong nung yimoktsü asoshi DMC ajanga jurisdiction kübok kilentzü aoba lenmangtem maneni müreker, ta pai ashi.

Iba dak sendakba nung DMC ajanga wards aser colony ajunga ketdangsürtem dang kilentzü aoba lenmang nung tapi agi jana indokba mittsü metetdaksüogo, ta ashi.

Tanü tenzükba awareness campaign yagi Dimapur nung alirtem asoshi temelenshi bener arutsütsü imlar, ta paisa ashi.



August 9, 2023 nü Kohima College, Kohima indang 56 buba Foundation Day amungdang tangokba noksa ka yangi angur. Iba sentong nung tesemdanger tongti ama taoba mapang iba college nung tesayur aser NPSC chairman inyaka alisang K Puroh dena liasü.



August 11, 2023 nü New Delhi nung linük tatong Tir, Jagdeep Dhankhar aser Youth Affairs & Sports Union Minister, Anurag Thakur nati 'Har Ghar Tiranga' Bike Rally tenzüksüdüang tangokba noksa nung angur.

Tzüngluruwa mongpu Parliament tembangogo; bill 17 agizük

New Delhi, Luroi/August 11 (Agencies): Hokolbarnü tzüngluruwa mongpu Parliament senden tembangogo; tan mongpu senden nung Manipur tensa nung ajemdaker opposition-i longkak aitba ajanga Hiouse anaprongla nung senden aiben thinena liasü.

Opposition teloktep I.N.D.I.A-i Lok Sabha nung Narendra Modi-i aniba sorkar anema no-confidence motion benoka liasü, iba sülen anogo asemnü o entepa aruba sülen sorkari opposition madak takok angu.

Tan mongpu senden tembanga anküp o jembidang Lok Sabha Speaker, Om Birlai, senden ghonda 39 dang agi aser Digital Personal Data Protection Bill, 2023 den The Government of National Capital Territory of Delhi (Amendment) Bill, 2023 densema tongtibang bill aika agizükogo, ta metetdaksüba sülen senden thinen.

Tan mongpu senden July 20 nü tenzükbä mapang nungi opposition party temi Manipur tensa nung ajemdaker longkak aitba ajanga Lok Sabha nung senden aiben thinena liasü.

Hokolbarnü senden tembangba anogo nung Ato kilonser Narendra Modi den defence minister Rajnath Singh aser home minister Amit Shah na densema minister tem teimbaka senden nung densema liasü. Senden tiptema

magitetyonga Delhi Services Bill densema o junga melemtepi bill aika agizüka liasü.

Tan mongpu senden nung Government of NCT of Delhi (Amendment) Bill agizük; iba bill ajanga Government of National Capital Territory of Delhi Act, 1991 yanglushia Delhi nung administration tashi kar Centre sorkar nem agütsür. Iba bill ajanga Government of the National Capital Territory of Delhi nung ketdangsertem transfer aser posting tsütsü Centre sorkar nem tashi tulu agütsür. Iba bill ajangasa NCCSA dak sendakba inyakym, Delhi Legislative Assembly ayongzüksü aser thinentü aser Chief Minister den tanga minister tem shimtsü atema Delhi LG nem tashi agütsür.

Parliament nung Digital Personal Data Protection Bill-a agizükogo; iba bill ajanga Data Protection Board of India tentetsü aser digital data dak sendakba mangatettep balala bentetsü atema inyakym latetsü.

Tan mongpu senden nungsa Forest (Conservation) Amendment Bill agizükogo; iba bill ajanga Forest (Conservation) Act, 1980 melener. Iba bill kübok linük arrtsülen kilometer 100 telongtet nung aliba alibo arem atema wazüka ayuba nung mezüngsemsü aser item arem nung zoos, safaris aser eco-tourism facilities amenoktsü

atema temelaba agütsüsü. Iba ozüng kübok sorkari achaayangba railway lenmang mesüra gari lenmang anasa aliba aremtem, arem wazüka ayuba küboki maittsü aser nisung alitsü, railway tasen yanglutsü aser lenmang anasa terenlok mapa balala inyaksü atema arem li melatsü. Ano International arrtsü, Line of Actual Control aser Line of Control nunga kilometer telongtet 100 tashi nung linük security atema terenlok mapa balala inyaksü atema arem li melatsü.

Tang mongpu nungsa agizükba tanünga bill temji-Mines and Minerals (Development and Regulation) Amendment Bill, The Cinematograph (Amendment) Bill, Pharmacy (Amendment) Bill, Constitution (Scheduled Castes) Order (Amendment) Bill, Registration of Births and Deaths (Amendment) Bill, Offshore Areas Mineral (Development and Regulation) Amendment Bill, Inter-services Organisations (Command, Control and Discipline) Bill, National Dental Commission Bill, National Nursing & Midwifery Commission Bill, Mediation Bill, Indian Institutes of Management (Amendment) Bill, Anusandhan National Research Foundation Bill, Biological Diversity (Amendment) Bill aser Central Goods and Services Tax (Amendment) Bill lir.

Ato kilonser Modi-i Manipur atema minute 2 dang jembibi: Rahul Gandhi

New Delhi, August 11 (Agencies): Parliament nung Ato kilonser, Narendra Modi-i jembiba onük nung ajemdaker Hokolbarnü Congress lenir, Rahul Gandhi-i Ato kilonser sashia aitsüogo.

Rahul Gandhi-i, Parliament nung Manipur atema jembiba mapang nung Ato kilonser menü aser asaya menüa liasü, ta ashi.

Rahul Gandhi-isa, Indian Army temi anogo ananü tsünga Manipur nung rara nokdangtetsü, ajisüaka Ato kilonseri Manipur nung mi meremsepdaktsüner, ta ashi.

Parliament nung Ato kilonseri jembiba onükji pai pa indang jembiba, pa tangatetba aser yimtenren indang dang liasü; Modi-i ghonda 2 ser minute 13 jembibi saka Manipur atemabo minute 2 dang jembibi, ta Congress lenirisa aitsü.

Ato kilonser Modi-i, 2028 küm nungbo 'no-confidence motion' malitsü, ta jembiba aija Rahul Gandhi-i, tasüngdangbaji- 2024 küm Modi Ato kilonser akümtsü asü makümtsü ta masü saka tanurtem densema nüburtem asüba tesem, Manipur indang lir, ta ashi.

"Yashi Ato kilonseri ghonda ana jembiba mapang pa menüba aser pai asayamenüba ni repranga liasü. Manipur

nung mi maneni adokba aser anogo aika mi adokba Ato kilonseri amadoker ama reprangteter," ta pai ashi.

"Parliament tagidak mapang nung Ato kilonseri menüa liasü; ibaji pa dak mapet. Onükji Congress mesüra ni atema masü, ajisüaka Manipur nung atalokba indang aser kechiba ibaji menokdangteter, ta asüba onük lir," ta pai ashi.

"Shidakba agibo Ato kilonseri Manipur-i oa nüburtem den jembitsüla aser 'ni ner Ato kilonser, anungji asenoki jembibi tenzükdü' ta ashitsüla saka iba tebilembaji ni mangur," ta pai ashi.

Manipur nung maneni raraba atema mejembibi; mezüngbuba nung raraji nokdangtsüla, ta Rahul Gandhi-i ashi.

Paisa, Ato kilonser Modi aser Home Minister Amit Shah nati 'Manipur nung Bharat Mata tepsetogo' ta pai jembiba oji tazünga o masü, ta ashi.

"BJP-i Manipur nung Hindustan tepsetogo," ta pai ashi.

Parliament nung Opposition MP tem anentsüba dak sendakba nung Congress MP Rahul-i, sorkari Opposition MP tem anentsüyonga yangji rara anendaktsütsü atema onoki inyaksü, ta metetdaksü.



August 11, 2023 nü New Delhi nung aliba Rouse Avenue Court nung ken o angadangba sülen Wrestling Federation of India (WFI) tongti aser BJP MP, Brij Bhushan Sharan Singh meyipa aodang tangokba noksa nung angur.

India-i sensotem dang tekeraba nung Niger toktsütsü metetdaksü

New Delhi, August 11 (Agencies): Hokolbarnü India sorkari Niger nung aliba sensotem dang akokba tashi tekeraba nung iba linükji toktsür arung, ta metetdaksüogo.

Ministry for External Affairs otongdar, Arindam Bagchi-i sangdong ka ajanga, "Tang iba tensa (Niger) nung ajemdaker India sensotem dang akokba tashi tekeraba nung iba linükji toktsür arutsü metetdaksür," ta metetdaksü.

July 26, 2023 nü Niger nung sepaitemi, linük Tir Mohamed Bazoum menden nungi atsüngdokogo aser sepaitemi linük yimsüsür, ta metetdakja liasü.

Tir tanüker, General Abdourahamane Tiani-i Tir atsüngdokba sülen linük nung tongtiji pa kümogo. Tang Niger

yimtina, Niamey kübok kiyong aika nung tensa mejungi lir.

Bagchi-isa, India sorkari Niger nung tensa mita reprangdar, ta metetdaksü.

"Tang iba tensa nung ajemdaker India nungertem dang akokba tashi nung iba linükji toktsür arutsü metetdaksür. Tang tayimtsü service anena lir. Ali ajanga arrtsülen adenba mapang nung kanga kümdangtsüla. Tarutsü anogotem nung Niger-i aotsü sentong alirtem danga tensa mesüngjem tashi maotsü tekümdangtsü metetdaksür," ta paisa metetdaksü.

Ano külen Niger nung sepaitemi US tongti ketdangser ka dang, kidanger linüktemi sepaitem amshia tiyongtsü aitra parnoki Mohamed Bazoum tepsettsü, ta amokmerenogo.



August 11, 2023 nü Rashtrapati Bhavan, New Delhi nung linük Tir, Droupadi Murmu-i Indian Postal Service (2021 & 2022 Batch) probationers den ajurudang tangokba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUROI 12, 2023

Parliament nung Manipur onük samadok

- P Tiamongba Aier

Opposition party temi Lok Sabha nung Centre sorkar anema no-confidence motion benoka olemtepba ajanga Manipur asoshi telemtetba tajung ka danga magiteti tembangba atema sasaa bilemstsür. Parliament nung iba tebilemstsü onük benoka jembiba ajanga Manipur nung takoksa ajurua alirtem temulung süneptsüsa lemtet kar agiküm aser sorkari ozüng alema inyaksangshirtem merenshitsüsa mapa kar tenzüküm ta teimla tulu liasü. Kechiyong Opposition-i parliament nung hadir tajung- "no-confidence motion" ka benokba ajanga nübertemi teimla tulu liasü. Ajisüaka, Parliament nung no-confidence motion benoker jembidang opposition aser treasury benches tsüngda tanga onüktem atema asatepdang Manipur onük samadok aser 2024 Lok Sabha elections atema nüboyimba maparen ka ama dang aküm. Manipur nung Meitei aser Kuki kintem tsüngda rara adokba atema alimai ola adoker aser mekümdangra iba mangatettep ajanga India asoshi tebilemstsü khuret tulu ajurutsü ama mongin nisungtem asadangteta Centre aser state sorkartem dang kümdangtsü shia arudar. Nisung aikati Manipur nung Chief Minister Biren Singh dak tamang samaogo aser iba ya pai külen tsütsü dang shir inyaksangshiba ajanga lir. Parliament nung olemtepba ajanga sorkari tenangzükba kar agitsü aser yimjung arutsü atema asalentong kar yanglua mapa tenzüksü akok ta Manipur nung alirtem aser Northeast nung alirtemi imlatepa liasü. Saka Centre nungi chief minister dak mapa inyaksüba mesüra yimjung atema action plan yanglutsü tebilemba kecha maliasü aser mesayu. Prime Minister Narendra Modi-i telangzüba agüja no-confidence motion olemtep tembang saka tensa süngjemtsü atema teimla makai dang tembangogo. Sorkartemi teinyaktsü shitak meinyakba ajanga Supreme Court-i iba onük asoshi tebang aittsüsa aküm. Central Bureau of Investigation (CBI)-i Manipur nung tetsür dak tashiyim mapa inyakba bushisüngdangba nung tenük yoktsü atema Supreme Court-i retired judge ka shima mapa nungloktsüogo. Maneni, Supreme Court-isa judge aseme akümba luden ka tenteta nübertem timtemba aser okrongba asadangtsü mapa lemezüksüogo. Shitakba agibo Centre sorkari Manipur nung yimjung bener arutsü aser nübertem taküm den kiojen kümzüka ayutsü osang tejangja ka sangoktsütsü atema no-confidence motion ya maongka tajung ka liasü saka Parliament nung parnok olemtep nung jembiba ajanga iba osangji meyoctet aser iba atema Manipur nung alirtem atema kanga dang sasaa bilemstsür. Külen, Opposition-ia no-confidence motion benoka jembidang Centre-i telemtetba tajung kar agitsüsa akangakanga noktak asübo jungla saka parnokia Manipur onük toktsür tanga onüktem ang jembiba toktepba ajanga kecha mesütet. Parliament nung lemtet tajung kecha magitetba ajanga iba tebilemstsü ya tangtangbo mekoktettsü anungji Manipur tensa süngjema akümstsü atema ano mapang agitsü aser tia makara khuret tuluba ajurutsü ana nung dang lir. Saka tatem nung Parliament nung kecha mesütetaka, Supreme Court-i linük madak tematiba ozüngren ketdangsürtem ama tasü itshia aser ochishia inyakra aser tim tetuyubatem agütsüra Manipur tensa süngjemtsüsa aser lemtet tajung kar agitsüsa mapang ka ajurudisü ta teimla tila kabo ayur.

OLEMSABANG

Tarutsü Putu Asoshi Tanü Lipokum Jenjang

Miss. Yapanginla, Source: Otongdar

(Yashi adok nungi...)

Laishiba nung Tsüngrem, pa alima nung teyangluba ajak nung atenba aser tesendaktep aliba (showing himself through his creation) kuli angutsü. Pai mi nung adoka sayur, mopung nung alir aser tzü nung ajurur. Lipok kaket nung "Kibuba Tsüngremi ali agi nisung yanglu" (Lipok 2:7; 3:19) ta shia lir. Tenüngsang ken nung Tsüngrem nem alima telungtiba nungi tetsübuttsüka aser tesüngmangtsüka yangluba asoshi tenüngsang agütsüba angutsü (T.Ken 139: 14-15). Tenüngsang Ken 148 nung, asenok iba alima den tesendaktep (intimacy) aliba asoshi tepelatsü aser tenüngsang agütsüba shia angutsü (mi aser rür, rürjeb aser tzü tangula, tenemti aser ungsem) aser tekong aika nung Tsüngremi apitetba sayangtetba koba agi pa nem akhüm aser tenüngsang bener arutsür iba indang tasüng alitsü. (T.Ken 19:1-7; 98:7-9; 104:1-5, 13-25; 148:3-13). Tasen lai nung, Yisu Khrista tesayubatem kodang züngdir, pa oshi nungji ecological tetuyuba angutsü. Pai ozütem aser labu naru, ayi, item ya amshia alima achaayangtsü osang bena liasü. Anungji asenoki iba lai tekongtem ajanga angatetbaji, Tsüngremi pai teyangluba (nature) tem ajanga meimchir den anasa arutsü meranger.

Tsüngremer Ketdangsür (Stewardship)

Tsüngremi nisungji inyaktsü aser anüktsü toktsü (lipok 2:15) aser iba ya yimsü asütsüba masü saka ketdangsür (steward) ka ama lipokum anepalutsüba asoshi lir. Tsüngremji tematiba lir aser ajak pa meyong lir (T.Ken 24:1), anungji pai yangluba alimaji asenoki meramoktsüla. Asen shisa taka Tsüngremi asen meimchir nem pai yangluba alima anepalutsü nungloktsü, aser iba telangzüktep ya kanga dang jangratemtsü lir. Iba mapa ya inyaktsü asoshi asenoki alima nung tenteta yangluba (creation) den telungjem nung shilem agia pelateptsüla. Anungji tanü lipokum jenjang tamajungba akümba tensa ka nung asenoki koma meimchir murumuru ya melenshia Tsüngremi nungloktsü ketdangsür ka ama alitsü? Kin ka ama kümer koma iba ketdangsür mapa ya ajak ajungtsü asoshi inyaktsü? Development tenüng nung iba alima raksa aoer. Anungji alima kümzüka sustainable development bener arutsü asoshi ochishiba (justice) nüngdaker. Iba ochishiba ya takar aser maongka alirtem asoshi dang masü saka sensaker sendoka alir ajak asoshi nüngdaker. Aji dang masü saka shiruru aser süngdonglidongtem ajak asoshi nüngdaker. Ajak ajungtsü asoshi iba mapa ya tang atema dang masü saka tarutsü asoshi tenüngdakba lir. Iba mopung melenba tensa agi asenok dang asüngdangbaji "Tanu putu yagi tarutsü putu pur nem kechi sentsüh atsür"? ("What does our generation owe to generations yet unborn?").

Iba lipokum yanglushitsü khuret ya tarutsü putu pur nem nungloktsütsüsbaji kanga dang lemtet temela ka lir. Saka asenok menua tezüba nung aliba ajanga tarutsü chirnur nem iba khuret yutsütsüji tim masü. Asenokji parnok tetsü-tebou asünung, ketdangsür tajung ka ama iba alima ya parnok asoshi wazüka ayutsü tim. Tarutsü nung parnok jangratema litetsüsa anepalutsüla, tang aliba den tajungba yangertettsüsa inyaktsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Tawa Texas nung samaba Pastor gari telung nung sür lia angu



Pastor Phillip Loveday

August 11, 2023: Taoba hopta Texas nung pastor ka sama-a liasü aser Mongolbar nikongdang (August 8) pickup truck ka telung nung pa tasü mang nguogo.

Freer, Texas nung aliba Faith Christian Center nung pastor arrshi küm 47, Phillip Loveday ya oil & gas company Kinder Morgan nung inyaka liasü aser pa kidang nungi mapai aoba sülen kidangi meshilangba ajanga pa bushi tenzüka liasü.

Corpus Christi Police Department nungi ketdangsertemi ashiba agi, Mogolbar nikongdang 3:00 ako atongtsü meta parnoki Philip Loveday meyong company gariji Nueces County kübok gari lenmang tezülen angu. Pa dak injang zübo liasü.

Corpus Christi Police Department-i Facebook post ka ajanga, "Gari telung nungji tasü mang ka angu. Medical examiner's office-i bushisü ngdangdar," ta

metetdaksü. August 2 anepdang 9:30 ako meta pastor Loveday kidang nungi mapai apusoa liasü, iba sülen pa kidangi meshilangba agi kinü ngertem aser Arogoi pa samaba osang sangdong. Kasa anogo nikongdang pai Arogo nung sayutsü ngitsü sentong liasü.

Osangbener den jembidang Kleberg County deputy, David Farias-i, parnoki truck ji South Texas Botanical Gardens anasa osüknü ka nung angu, ta metetdaksü.

Arogo indang Facebook page ajanga, "Nenoki anguba aser angashiba ama ozü ng amer ketdangsertemi Phillip mang nguogo. Iba osang angashia par kibong aser medemertem melung raksar. Par kibongi mangyimba mapang nung yimlibilema ajaki awashi metetang. Sarasademtsüba aser yariba atema pelar. Maneni par kibong aser medemertem atema sarasademjang," ta

mepishia metetdaksü.

Loveday-i pa kinungtsü, Melea Loveday den tanur pongu aser semchir ka toktsür pilaogo.

Pa asüba nung ya shinga dak-a melung malemtsüsa mali, ta police-i shiogo, anungji pai pasasa taküm tembangtsü telemetba agi südi ta bilemer.

Tawa Barna research ka ajanga, tesüiba küm 7 tsü ngda pastor tem shi aser shisatsü nung timtemba tali bulua akümba metetdakja liasü.

2015 nungi 2022 küm tashi nung Evangelical polling organization-i ketdangtsü agiba survey ajanga yamai bushiteta liasü, 2015 küm shi aser shisatsü naprongla nung timtem alir pastor tem shilem 3 dang liasü saka 2022 küm nungbo shilem 10 kümogo.

2015 küm shi aser shisatsü napongla health kanga junga alir pastor tem shilem 39 liasü saka 2022 küm nungbo shilem 11 dang liasü, ta kasa survey ajanga bushitet.

ANOGO ABEN TSÜNGREM DEN

Mochitzü Dang nungi Tanagba T.Ken 119: 97 - 104

Shingai mochitzüji tanang masü ta meshitettsü, saka mochitzü dang nungi tanagba Tsü ngrem O ji lir: "Kü tebang dang Ne O koda tanang, mochitzü dang nungi ibai tanagba lir" (t. 103).

Tsü ngrem O ji ne tebang dang ninang mochitzü ama asü mozü ama lir ? Asenoki Laishibaji taneptsü mozü ama agitsü mapang ka lir. Saka Laishibaji mozü dang nungi taoba lir.Nai Tsü ngrem O jangraba jagi na tanaben asoba taküm ka ta kuli asür, kechiaser Laishiba tanela asoshi chiyongtsü lir.Yobi ashi, " Pa bang nungi kazükba o tem ni kodanga mendok; kü chiyongtsü dang nungi talisa ni Pa O rizü ngogo" (Yob 23: 12).Yeremiai ashi. " Ne O tem angu aser ni itemji achi aser kü mulung asoshi jangratemtsü ka lir" (Yr. 15: 16).Yisui ashi, " Nisungi am tesa agi taküm malir, saka Tsü ngrem bang nungi adokba o shia agi taküm alir" (Matt. 4: 4).Peteri asenok dang ajungshir, " Nenok tekümtet dangi aitsü asoshi tanela mamatzü temeja asoshi jangraang" (1Pet. 2: 2).

Kodang shirangdir, techinüba melenshir - chinüa mejangrar.Yamaji temeneni asenok taküm nung tanela chiyongtsü mejangrai kümdaktsür.Asenoki tanga kakettem zü ngaka teti Tsü ngrem o tanangji azü ngtsü jangratsüla. Mezü ngbuba Laishibaji azü ngdang taku ama zü ngtettsü akaok, saka ibaji tanang agi melentsür.

Chiyongtsü tajung agi ne tanela mesütsüji tongtipang lir.Nai Tsü ngrem o agi ne tanela mesür asü masü? Laishibaji shirnoki meimer parnok asoshi aji tanang lir. Iba tesayuba nung alitsü angazükang.

India nunger Khristantemi 'Black Day' anogomong nung longkak ait



August 10, 2023 nü Andhra Pradesh state nung Khristantemi 'Black Day' anogomong nung longkak aيتدang tangokba noksa nung angur.

New Delhi, August 11, 2023 (Agencies): August 10, 2023 nü India nunger Khristantemi "Black Day" anogomong nung longkak aita among aser Dalit nunger Khristan o Muslim nunger nem reservation jenjang agü jang, ta takhangba agütsü.

Linük tesem balala nung Khristantemi longkak aita jaja, lokti senden ayongzüka agi aser o entepba sentong ayongzüka agiogo.

Khristian denominations balalaisa sorkar dang Dalit nunger Khristantem nem sorkar mapa aser shisaliok rejutem nung menden shiteta yutsütsü (reservations) atema scheduled

caste (ST) jenjang agü jang, ta takhangba agütsü.

Tang India linük nung Khristan nütsü ng million 25 shi lir aser iba nungjagi shilem 75 bo Dalit nunger Khristantem lir.

Brihostibarnü New Delhi nunga Catholic Bishops' Conference of India (CBCI), National Council of Churches in India aser National Council of Dalit Christians-i Sacred Heart Tenla kima longkak aita liasü.

Parnoki iba sentong ya Jantar Mantar nung agitsü tebilemba liasü saka ketdangsertemi iba tesem memelaba ajanga Tenla kima dang agi.

Dalit nunger Khristantem

as er Muslim nungertemi Supreme Court dang parnok nem ST jenjang agü jang, ta mepishiba sülen yaküm October ita nung Supreme Court-i taoba mapang Chief Justice K.G. Balakrishnan leniba nung Commission ka tenteta liasü. Taküm May ita nung Balakrishnan-i, Commission-i küm ka tsü ngda report agütsütsü, ta metetdaksüogo.

August 10, 2023 nü osangbener den jembidang CBCI indang Office for Scheduled Castes/Backward Classes secretary, Vijay Kumar Nayak-i, "Onoki temeden mangu tashi yimjung nung

longkak aittsü. Ajsiüaka tangbo onoki teimla tulu ayur," ta ashi.

Paisa, "India nung Arogoi Dalit nunger Khristantem nem scheduled caste jenjang agütsü daktsüner," ta metetdaksü.

Paisa, "Supreme Court-i tan ita mesüra taruba ita nungi temepishiba ken oji angadangtsü," ta metetdaksü.

SC nem temepishiba ken o agütsürtem rongnung ka-Thomas Franklin Caesar-i, "Maneni takhangba agütsüyonga tang tashi telangzüba tajung mangur. Parnoki [Dalit nunger Khristan aser Muslim nunger] linük temzü ng nung agüja aliba temeden akhangar," ta ashi.

India nungbo tamangba yimsü melenshiba ajanga loktiliba nung sendokbaji tim masü, ta paisa shisem.

2009 küm nungi tenzüka Dalit nunger Khristantemi küm shia August 10 nü "Black Day" amonger, aser tangbo iba anogomong nung Khristan denomination ajaki shilem agir.

India nung Hindu, Sikh aser Buddhist Dalit nunger nembo Scheduled Castes jenjang kübok maongka aser tajangzü k balala agütsür. Küm meyirjang aika India nung Dalit nunger tekübo ktiba jenjang nung dang

zü ngshia liasü, aser tang tashi Khristan mesüra Muslim yimsü agizüker Dalit nunger nem SC jenjang magütsür.

India nunger temzü ng kübok Dalit nungersa süaka Hindu, Sikh aser Buddhist nunger nem maongka balaka agütsür saka Muslim aser Khristan Dalits nembo item maongkaji magütsür, ibayongji küm shia August 10 nü Khristantemi longkak aita "Black Day" amonger.

1950 küm August 10 nü India Tir mezü ngbuba, Rajendra Prasad-i sign asüba Constitution (Scheduled Caste) Order (Paragraph 3) nung mezü ngbo yamai sangdonga liasü, "Hindu yimsü dak alaka tanga yimsü amangertemji Scheduled Caste zü ngsem asütsü metemtsü."

Sikh nungeri item maongka akhangba sülen parnoka zü ngoktsü atema 1956 küm temzü ng yanglushia liasü. 1990 küm Buddhist nunger nem-a kasa maongkaji agütsü. Dalit Muslim aser Dalit Khristantemia kasa maongkaji akhangar saka magütsür.

Hindu nunger billion 1.3 aliba linük nung nütsü ng shilem 2.3 dang Khristan nütsü ng lir aser iba nungjagi shilem 60 shibo Dalit Khristantem lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Rongrong

(n) ola tulu adoka asaperanga tipmatem aküm (tumult)
* Manipur nung mangatettep adoka rongrong tuluka adok.

Rongrongshishi

(n) lokti nung tipmatem ola adokba (tumultuous)
* Tanü asüng lokti nung rongrongshishi kanga adoker.

OLONG PAITEP # 6603

Grid for OLONG PAITEP # 6603 with numbers 1-17 placed in specific cells.

TIPIEN

- 2. Külen dang masü - (6)
6. Suwar masü - (4)
7. Süng mesüra sü kongsa ayudak - (6)
9. Tashi mali aküm - (4)
10. Tanishir - (5)
11. Sü temang nung enok - (4)
14. Asüngdangba ashi - (6)
16. Saklok - (4)
17. Arem shiruru ka - (6)

LANGTSÜNGLEN

- 1. Amang ozü ka - (5)
2. T _ _ _ _ aiter - (4)
3. Sü yanglu - (4)
4. Kimen - (6)
5. Ain tamajung - (3)
8. Saklok - (4)
9. Chiyongtsü tamajung aküm - (4)
10. Kiochtsü yangluba tou - (6)
12. Melenshitaksü / Alenbanga ayu - (5)
13. Tzuma nung senzüba - (3)
14. Tanemi - (4)
15. Ta _ _ _ _ talu - (4)

OLONG PAITEP # 6602 TELANGZÜBA

TIPIEN:

- 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kiochtsü, 17. Itsük, 18. Kar.

LANGTSÜNGLEN:

- 1. Tai, 2. Asensor, 3. Tanü, 4. Kua, 5. Mitsüksü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.

NAI-A YA METETTER MA

'E-mail' program purateta yanglutetsang



VA Shiva Ayyadurai

Indian-American VA Shiva Ayyadurai-i computer ka nungi computer tanga kati shidi aser iba amala osangtsüsang yoktetba computer program mezüngsüa purateta yanglu ta US sorkari August 30, 1982 nung agizük. Ayyadurai-i 1978 nung telok ka indang office ki ka nung amshiba computer ka nungi tanüngba office ki balala nung amshia computer-tem dangi shidi yoktettsü program ya purateta yangluba sülen iba program dang 'E-mail' ta aja. Tesülen, 1982 nung pai copyright ta ajaba 'E-mail' program ayoktsü mesüra lemshitsü temeten agizüka ayu.



August 11, 2023 nü Imphal nung Manipur Chief Minister N. Biren Singh-i General Officer Commanding-in-Chief, Eastern Command, Lt. General RP Kalita den ajurutepdang agiba noksa ka angur.

CorCom-i Manipur nung Independence Day mokdangtsü

Imphal, August 11, 2023 CorCom-i sangdong ka nung alir telungpur telok 6- (Agencies): Manipur nung ash. Kangleipak Communist Party telungpur teloktemi tentetba Ajisüaka medical, water (KCP), Kanglei Yawol Kanna Coordination Committee supplies, fire services, lokti Lup (KYKL), People's (CorCom) ajanga 76 buba aser tamangba yimsü Revolutionary Party of Independence Day sentongtem aser media den Kangleipak (PREPAK), its mokdangtsü ayongzükogo. essential services iba Progressive faction (P R E P A K - P r o) , CorCom-isa Manipur nung Parnokisa Manipur nung Revolutionary People's Front ghonda 17 ser tesadang alirtem dang kidang nungi (RPF), the political wing of mokdangtsü metetdaksü. mayazüktsü aser August 15 of the People's Liberation Army Mongulbarnep 1:00 ako nü India linük wako (PLA) aser United National nungi mokdang tenzüktsü aser matsükettsü ayongzük. Liberation Front (UNLF) ibaji nikongdang 6:30 ako dena lir. nung tembangtsü ta tanü CorCom nung lendenlen

Arunachal sorkari Sir Ganga Ram Hospital den MoU agitep

Guwahat, August 11, 2023 (Agencies): Arunachal Pradesh sorkari Sir Ganga Ram Hospital and Religare Enterprises den MoU ka nung sign sütepogo. Pradesh nung healthcare sector Excellence for Renal Sciences ajungmesor ta Health Minister Alok Libang-ia ashi. Iba Centre of Excellence nung dialysis aser kidney transplants dena kidney tashidak balala anepalutsü. "Onoki Arunachal Pradesh nung healthcare maparen tajungba akümtsü tenangzükba lir" ta Religare Enterprises executive chairperson Dr Rashmi Saluja-ia metetdaksü. "Iba tesentaktep ajanga onoki Arunachal Pradesh nung alirtem tenzüktsü maongka angutsü aser Northeast nung Arunachal ya healthcare services hub kümdaktsütsü amanger" ta Dr. Rashmiashi. "Onoki Arunachal Pradesh nung healthcare ecosystem ajungba kümdaktsütsü tenangzükba lir" ta Sir Ganga Ram Hospital Board of Management nung chairman Dr Ajay Swaroop-ia ashi. (TRIHMS) nung Centre of Excellence for Renal Sciences lapoktsü. Iba Centre of Excellence nung dialysis aser kidney transplants dena kidney tashidak balala anepalutsü. Sir Ganga Ram Hospital and Religare Enterprises-isa Arunachal nung healthcare workers nem training agütsütsü. "Iba MoU ya Arunachal Pradesh nung alir ajaki healthcare services jenjang dalang agi aser zübazübaa angutsü alizüng atonger" ta Chief Minister Pema Khandu-i ashi. "Sorkari healthcare services anasatiba nung bener arutsü aser shiranger kibongtem nem timtem ajemtsütsü meranger" ta Tomo Riba Institute of Health & Medical Sciences Iba MoU ajanga Arunachal

ECI-i Assam delimitation indang final draft metetdaksür

Guwahati, August 11, 2023 (Agencies): Election Commission of India (ECI)-i Assam nung Parliamentary aser Assembly Constituencies delimitation maparen asoshi August 11 nü final order ka metetdaksüogoo. ECI-i Assembly Constituencies 19 aser Parliamentary Constituency 1 atema tebilembatem angadanga sülen nomenclature meyipa repringshio. Guwahati nung July 2023 ita piyong ECI-i public hearings agia liasü aser iba mapang Chief Election Commissioner Rajiv Kumar-i anir Election Commissioner ana- Anup Chandra Pandey o Arun Goel na aden. Revised Assembly Constituency Names: Mankachar - Revised to Biringjarua South Salmara - Revised to Mankachar Manikpur - Revised to Srijangram Bhowanipur - Revised to Bhowanipur - Sorbhog Rupshi - Revised to Pakabbari Boko (ST) - Revised to Boko-Chaygaon (ST) Hajo (SC) - Revised to Hajo-Sualkuchi (SC) Gobardhana - Revised to Manas Batadraba - Revised to Dhing Nagaon - Revised to Nagaon-Batadraba Sootea - Revised to Nadaur Chabua - Revised to Chabua-Lahowal Moran - Revised to Khowang Dima Hasao (ST) - Revised to Haflong (ST) Algapur - Revised to Algapur - Katlicherra Badarpur - Revised to Karimganj North North Karimganj - Revised to Karimganj South South Karimganj - Revised to Patharkandi Ratabari (SC) - Revised to Ram Krishna Nagar Revised Parliamentary Constituency Name: Darrang - Revised to Darrang-Udalguri

GOVERNMENT OF NAGALAND
DIRECTORATE OF TECHNICAL EDUCATION
NAGALAND, KOHIMA

NO.DTE/ESTT-2/02/2023-24

Dated Kohima, the 10th August 2023

NOTIFICATION

In continuation of this office letter even NO.DTE/ESTT-2/02/2023-24 Dt. 1st August 2023, that list of selected candidates for North East Council (NEC) State Reserved Seats in (1) B. Sc. Agri, (2) BVSC & AH, and (3) B.Sc. Sericulture is publish in the Office Notice Board or can viewed from the department website www.dtenagaland.org.in.

Selected candidates are informed to follow the instruction given in the Notice Board.

(Er. Vipulhouhoung)
Director

Syrian sepai 20 tepset, ISIL dak tai tongloksü

Mayadeen, Luroi/August 11 (Agencies): Syria anüdoklen Syrian sepaitem mena aliba bus ka prangbong bena alirtemi meita atar amakdang nisung 20 shi asü aser aika yiru, ta opposition activists temi ashi.

Britain nung amenoka aliba Syrian Observatory for Human Rights (SOHR) ajanga Hokulbarnü ashiba agi, Iraq den arütsüa aliba Deir Az Zor province kübok Mayadeen jila anasa lenmang ka nung amakdang Syrian sepai 23 tepset aser 10 yiru.

Danga Syrian activist telok temia sepai 20 tepset aser dangartem yiru.

SOHR ajanga ashiba agi, iba lendong ya ISIL (ISIS) züngsem temi agütsü, aser Syria nung iba telok madak 2019 nung takok nguaka züngsemtem mapang talangka süngjema arur maneni lendong tulu agütsür.

Prangbong bena alirtemi bus ya lungbanger injang

khaloktsüba sülen sepai ter dak tema samaogo ta ashir, koba ISIL temi taküm lendong agütsüba rongnung tesashitiba alitsü.

Syrian army mesüra sorkar nungi tang tashi sangdong kecha agüja mali.

Syria nung ISIL sleeper cells temi talisa taoba mapang par kübok aliba lisem lima nung amakba ya tawa tali tesashiba aser tamajungba kumogo, ta SOHR tekolakba Rami Abdurrahman-i ashi.

Akok tashi nisung timba südaktsütsü mechi ISIL temi mitkar dak amakba tang tali tesashiba kumogo, ta Abdurrahman-i ashi.

Yamaji inyakba ajanga iba telok ya tang tashi yakyaka aser tashi ita lir ta sayur, ta pai ashi.

Iba telok yagi par lenir asütsü tan ita Abu Hafs al-Hashimi al-Qurashi shim, anungji Turkey-i April ita iba telok lenir Abu Hussein al-Husseini al-Qurashi tepsetogo ta ashiba tali

jangjatsür.

ISIL yagi Syria aser Iraq nung tesem tululu amokbanga liasü aser parnok 2014 küm June ita caliphate sangdong. Iba sülen parnok ket nungi tanem tanemi par kübok aliba alinük samaa ao aser Iraq nung 2017 küm makdok aser Syria nunga küm ana lir makdoka liasü.

Syria nung ISIL kübok aliba alinük tatembangba ya 2019 küm March ita Kurdish-i anir aser US-i aniba coalition teyari nung raradak agidaksü, saka sleeper cells temi maneni lendong tesashi agütsür.

Lisem agi sünga aliba Deir Az Zor province ya Iran aser Russia nati yariba Syrian sepai aser United States-i yariba Kurdish sepaitem tsüngta sadanger yimsü asür.

ISIL yagi civilian, Kurdish sepaitem aser ano sorkar meyong sepaitem aser allied pro-Iranian fighters tem dak tenük yoker amaker.

Rohingya nung rong ka makepok, nisung 23 asü aser 30 samar bushir

Sittwe, Luroi/August 11 (Agencies): Myanmar kübok Rakhine state nungi Rohingya nungertem jena aodang parnok mena aliba rong tzüyim telungi aluba sülen nisung tasü mang 23 ngutetogo.

Nisung 31 samar tang tashi bushir aser nisung ti iba lendong nungi tekum jenbuogo ta ashir.

Iba lendong nungi takum jenburtemi ashiba agi, parnok ya Malaysia atongtsü merangba mapang nisung 50 dak tema mena aliba rong Deobarnü tzi telungi alu aser rong ketdangsür temi yutsür ao.

Küm shia Rohingya nung meyririjang aikati Malaysia mesüra Indonesia atongtsü asoshi lendong balala aliba tziyim nung jajar.

Parnok ya Myanmar nung reshikangshiba aser Bangladesh nung nisung tali aliba refugee

camps tem nungi jena aor. Tan hopta asürtem rongnung tetsür 13 aser tebur 10 aser parnok ajak Rohingya Muslim nungertem lir, ta rescue team kati ashi.

Muslim Rohingya nung ya Buddhist yimsü amangertem timba aliba Myanmar linük nung ethnic minority lir. Burmese military temi 2017 küm iba kin samatsütsü meranga azüdokshiba mapang Rohingya nung aika Bangladesh nung jenok. Myanmar nung anüngzüka alirtema 2021 küm mitkar temi sorkar atsüngdokba sülen jena aotsü meranger.

Tan hopta tzi telungi aluba rong nungi takum jenbur temi ashiba agi, Rakhine yimtiba Sittwe anasa tzi sem tuluka agi parnok mena aliba rong nung kongshi.

Iba sülen Malaysia-i aotsü

atema nisung shia sen \$4,000 agir aliba shibelener temi parnok mena aliba rong yutsür ao. Iba lendong nung asürtem tasü mang ya danga rong tem ajanga ngutet aser kar tziikum nung pongteta liasü.

Andaman Sea ajanga ango apuba rong nung nisung tali mener jajaba ya teti lendong lir, saka küm nung tang mapang ya tamajungba, kechiaser tang meyi yipru tesashitiba ajurur.

Rohingya nung timbai October aser May tsüngta tziyim ya ajangtsü meranger.

Parnok ya Myanmar nunga lendong timtem ajuruba mechi aser arütsü alema orr Bangladesh nunga nisung tali adenshia aliba refugee camp nung melinü dang ali ama par rongsen yoker takum bendanga agütsür tziyim ajanga rong tila nung aotsü molungteter.

South Africa tir tejenba Jacob Zuma anisüngzük angur

Johannesburg, Luroi/August 11 (Agencies): Tepuokdak nisung tali yua aliba mechi South Africa indang taoba tir Jacob Zuma tepuokdaki meyi pa maotsü.

Court mezüngmeshiba mechi ita 15 tepuokdak ayutsü alisang Zuma ya Hokulbarnü ketdangsür dangi aru.

Taoba mapang pa medical parole nung chioka liasü, koba court temi aitsü.

Justice Minister Ronald Lamola-i ashiba agi, tepuokdak nisung tali aliba mechi pa nem

tatok agütsü. Tila-teri nung aibelener alirtem chioka prison system tajungba kumdaktsütsü nükjidong nung iba mera ya agi.

South Africa indang Commissioner of Prisons, Makgothi Thobakgale-i ashiba agi, Hokulbarnep Zuma ya par ki aliba KwaZulu-Natal province kübok Estcourt Correctional Facility bushia aru aser system nung aniok saka ghonda ka lir chiok.

Tila-teri nung aibelener mechi tepuokdak yua alir nisung

9,000 dak tema nem tatok agütsüba ya Tir Cyril Ramaphosa-i mela.

Iba maparen ya April ita tenzük, ta pai ashi.

Taoba tir tepuokdak nungi chiokba anema temzüng-ozüng tsütsü lenmang bushia nokdaksü, ta South Africa nung opposition party tuluba, Democratic Alliance ajanga ashi. KwaZulu-Natal nung tang yimsü tesü dak African National Congress (ANC) ajanga iba telemtetba pela agizük aser ibai linük asoshi tajungtiba lir ta ashi.

Mulungnen



Late A. Lanumeren Imchen
March 21, 1947 - July 30, 2023

Ozü temeim obala shiranga aliba mapang aser pa iba lima nungi pilar onok mangyim jashi tia nung alidang tembar-medemertem, lokti tentet balala, arogotem aser temeimertem shirnokisa onok dang meima yaritepogo, nenok ajak den onoki kanga pelaba mulungnen o ka yangi lemsateper. Nenok teyari tulu, tesü nep o aser temeim mapatem agi onok mulung kanga süngzükdaksüogo aser obala taküm aser onok kinungertem asoshi Tsüngremer tabensa sentong angatetdaksüogo.

Iba ama timtem shisabolu mapang onok den yaritepba asoshi nenok ajak den onoki kanga pelar. Nenok nübo, rongsen aser temeim mapatem onok mulung nung teti alitsü. Onoki nenok nem kecha meyi pa magütsütetaka Tulusang Tsüngremi nenok ajak teti Pa temoatsü manung junga lidakjangma ta onoki sarasademtsür.

Onoki nenok ajak den kasa tepela lemsatep dang, item yabo tenüngteta shisemer :

1. Mengmetong Senso Telongjem Dimapur
2. Mengmetong Senso Telongjem Dimapur, Diphupar unit
3. Mengmetongtsür Telongjem Dimapur
4. Foothill Ao Youth Organization
5. Business Association of Naga (BAN)
6. Entrepreneur's Guild (EG)
7. Showuba Area Ao Senso Telongjem
8. Old Showuba Village Council
9. Old Showuba Ao Baptist Fellowship
10. Dimapur Mangmetong Nongnangpong kidong
11. Diphupar Mangmetong Fellowship
12. Showuba Baptist Church
13. Ao Baptist Fellowship Women Department, Old Showuba
14. Youth Ministry Ao Baptist Fellowship. Old Showuba
15. Doctors, Nurses aser Staff, Eden Hospital Dimapur
16. Open Door Old Age Home.
17. Tabernacle Baptist Church, Naga United Village

**Temeim aser Sarasadem nung,
Mr. & Mrs. Achen, Impang aser Easter.**

**SÜR KÜM KA AJUNGBA
MENUNGRA BILEMTETER**



Late C. AOLEPDANG AMRI
12.08.22 - 12.08.23

Teti onok Mulungjang nung lir.
~ Chirnur aser Semchirtem.

23 buba NSF Martyrs Memorial Trophy September 18 nung tenzüksü

Kohima, Luroi/August 11 (TYO): angami Students' Union (ASU) ajanga "Goal for Peace" omen nung ajemdaker 23 buba NSF Martyrs Memorial Football Trophy ya Indira Gandhi Stadium, Kohima nung September 18 nungi October 14, 2023 tashi ayongzüksü.

Kohima nung aliba ASU office nung Organising Committee convenor Mhasimhalie Mathew Yhome-iba asayamung dak sendakba nung osangbener den jembidang, Nagaland nung NSF trophy ya football asayamung nungtugu ka lir, ta ashi.

Iba asayamung indang sempet timba kumtsüogo aser taküm iba asayamung champion nem sen lakh 2.50 den running trophy agütsü, runners-up nem sen lakh 1.50 den kulizung kaket agütsü aser semi-final nung tsükba telok shia (ana) nem sen 35,000 agütsü aser quarterfinal nung tusker telok shia (pezü) nem sen 20,000 agütsü, ta pai metetdaksü.

Kija sempettem - Best Goal, Best Midfielder, Best Defender & Highest Scorer - atema sen

10,000 den trophy aser kulizung kaket agütsü aser Player of the Tournament nem scooty ka agütsü, ta ashi.

September 14 nü mezüing asaya ya nikongdang 4:00 ako nungi asayatsü aser iba anogo angati arua reprangtetsü saka tanüingba anogotem gallery ticket nisung shia sen 50 alitsü aser aonung asayatsü aliba quarterfinals nungi nisung shia sen 100 agütsü, ta pai ashi.

NSF trophy ya Kohima Village nungi linük asoshi takum bendanga agütsür kaketshir Asür Kekuojalie Sachü aser Kigwema Village nungi Asür Vikhozo Yhoshü bilemteta aser tena nem akhum agüja küm shia ayongzükba football asayamung ka lir, ta Organising committee co-convenor Khriezehou Vitso-iba ashi.

Indo-Myanmar arütsü nung 5 KM nungi 20 Km tashi Disturbed Area Belt (DAB) atsülangtsüba anema 1986 küm NSF ajanga 'silent protest' ayongzükba nung shilen agidang tena ya Nagaland Police-iba khaset.

Lanurtem nem pei sempet amshidaksütsü aser parnok

saisapong nung temolung agütsü asoshi ajungmesoa iba asayamung ya ayongzük, ta ASU tir Khriesamhalie David Mere-iba ashi.

Cash prizes timba kumtsüba asoshi convenor-iba ashiba tali rajemtsüba mapang, 2025 küm NSF trophy Golden Jubilee benjongmung aliba mechi aser team tajungba nung ketdangtsü asoshi sempet sen timba kumtsü, ta ASU general secretary Vimeyiekho Vitso-iba ashi.

Iba asayamung nung team 50 shi arua shilem agütsü imlar, ta Technical Committee i/c Thejalhoukho Thomas Khawakhrie-iba ashi.

Iba asayamung nung shilem agütsü asoshi form ya August 14, 2023 nungi tenzükba Kohima nung ASU Office below Radio Station Kohima, Magdalene Coaching centre Lerie, Sports World Main Town, Sports Paradise Keziekie aser Royal Enfield High School junction nung angütsü aser G Sports, Chumoukedima aser Kiran Sports, Dimapur nung angütsü. Form submission atema September 14 ya tatem alitsü, ta pai metetdaksü.

Kumlong Ward-i 2nd Mkg Inter-ward volleyball tournament benogo



Mokokchung, 11 Aug (TYO): 2buba Mokokchung Inter-ward volleyball tournament August 9 nungi tenzükba anogo asem nü tashi yangi Multi-purpose Sports Complex, Mokokchung nung asaya-a mungogo. Iba asayamung ya Mokokchung District Volleyball Association aküm nung Kümlong Sporting Association-iba ayongzükba lir.

Taküm iba asayamung nung tesüsabuba asaya Kumlong Ward o Artang Ward na asayaba, Kumlong-iba Artang pur madak takok tulu ngua taküm iba asayamung marok parnoki benogo. Takoker nem senpet sen 30,000/- aser atongdakba nem 20,000/- agütsüogo. Nija

senpet best setter, best spiker aser player of the tournament nungertem shima senpettsü.

Iba asayamung nung Mokokchung town kübok ward 9-iba shilem agia liasü. Artang ward-iba semifinal nung Yimyu ward tsükdaksü aser Kumlong ward-iba defending champion Sungkomen pur tsükdaksü. Iba asayamung nung takoker telokji tetendanga kecha mekai indang-indanga MDVA-iba ayongba Imchaba open Nagaland volleyball tournament nung shilem agitettsü.

Tanü senpet agütsüba aser asayamung shibangba sentong nung District Planning Officer, Mokokchung, Imlikokba Lkr tetushi tejaoker liasü.

SVEEP atema state nung sports outreach sentong akatsü

Dimapur, Luroi/August 11 (TYO): Dr. Tinojongshi Chang, NCS, Deputy Commissioner & District Election Officer, Tseminyu ajanga Nagaland atema 2023-2024 nung state-level Systematic Voters Education and Electoral Participation (SVEEP) action plan tenzükba sangdongogo.

Iba sentong kübok Chief Electoral Officer Nagaland,

Kohima aser Nagaland Sports Association lungjemer saisapong nung state-wide outreach program ayongzüksü.

Iba mapang Tseminyu District nung nisung 100 atema certified coaches temi ananü angati football coaching ayongzükba agütsü. Iba den külemi voters awareness aser lanurtem vote agütsü asoshi tenüing zülüoktsü ajungmesoa tanabü buba nung exhibition

match ka ayongzüksü.

Iba sentong nung shilem agütsü asoshi government aser private school (Higher Secondary School) tem nungi September 12, 2023 tashinung kaketshir shimtsü ajungshir, ta sangdong ajanga ashi.

Iba sentong ya September 14 & 15, 2023 anogotem Rengma Sports Association (RSA) ground, Tseminyu Old Town nung ayongzükba alitsü.

FIFA Women's World Cup: Sweden aser Spain semi-final tongogo

Auckland, Luroi/August 11 (Agencies): Tang tasayadak FIFA Women's World Cup quarterfinal asaya ka Eden Park, Auckland nung Japan-iba asaya tatemlen kanga junga asayatetaka Sweden-iba 2-1 agi takok ngua iba asayamung last four nung taoba mapang champion kata mali kumogo.

Last 16 nung iba asayamung pezüben champions bena aliba United States tsükdaksür anogo pongu lir Hokulbar nikongdang 2011 champions den asayadang Sweden-iba amokbanga liasü aser kasa stadium nung Mongulbarnü Spain den semi-final asayatsü jangjaogo.

Defender Amanda Ilestedt-iba asaya tenzük minute 32 buba nung goal ka agüja Sweden tejaklen liasü aser ibai la asoshi iba tournament nung goal pezü buba liasü, aser first half sülen penalty spot nungi Filipa Angeldal-iba tanabuba goal agütsü.

Japan-iba kodanga tezü danga masaya saka minute 76 buba

nung Riko Ueki-iba penalty ka meyoktetba aser minute 11 sülen la melena asayala Honoka Hayashi-iba goal ka agütsütetaka Sweden akoktsü menura liasü.

Taküm Australia aser New Zealand lungjemer ayongzükba FIFA Women's World Cup nung Japan-iba goal 15 agütsür tsükogo, koba tang iba asayamung nung anünga aliba team katia yamaji goal agüja mali. Hinata Miyazawa-iba goal pongu agüja lar linük asayaba anenogo, saka lai Golden Boot angütsü teimla lir.

Iba asaya tetenzük nungi yimya balaka nung asaya liasü. Jenjang asem buba nung aliba Sweden ya tashi tait aser jenjang 11 buba nung aliba Japan ya technical tsütsü tajungba liasü.

Asaya tenzük minute 25 buba nung Stina Blackstenius-iba Japan defender Saki Kumagai alema oa Japan goalkeeper Ayaka Yamashita kisüing ajuru saka lai metsüba ball tezülenti ao.

Ilestedt-iba goal yokba sülen minute 42 buba nung Kosovare

Asllani-iba goal ka agütsütetsü ama liasü, saka lai metsüba ball ya Yamashita-iba nungzükba yok.

Sweden tsürtem ya Japan nung dang tar talangba aser tashi taitba liasü. Asaya tenzük minute 63 tashi Japan-iba Sweden goalkeeper tsütsü ball kata meyokteti liasü.

Asaya tatemlen Japan tsürtemi Sweden goalkeeper Zecira Musovic kanga belemdaksü, shibai United States madak takok angudang goal 11 nokdangteta World Cup otsü tasen yanglur liasü.

Minute 76 buba nung Japan asoshi Riko Ueki-iba penalty metsüba crossbar nung tsükdak. Saka minute 86 buba nung substitute Honoka Hayashi-iba goal ya yokteta liasü.

Tokyo Olympics nung Sweden-iba Japan ya quarterfinals nung tsükdakja gold medal match tashi asaya saka Canada-iba akok.

Sweden yagi World Cup mesüra Olympics nung takok

kata ngudanga mali.

Kasa anogo asaya dang aka nung substitute Salma Paralluelo-iba mapang apulokja asayaba mapang goal ka agüja Spain-iba 2-1 agi Netherlands madak takok angu aser Women's World Cup semi-final tang mezüingbuba tongogo.

Telok ana tsüingta goal ka agütsür liasü saka arishi küm 19 tain Barcelona winger-iba asaya tatemlen goal ka agütsüteta lar telok, Spain ya semi-final tongtet.

"Ibai ajak asoshi tongtipang. Onoki takok nguogo. Onoki tatem tashi nokdak. Onoki amanga liasü," ta Paralluelo-iba asaya temer ashi.

Spain ya taoba World Cup ana nung round of 16 alema moteti liasü aser Mogulbarnü Auckland nung parnok Sweden

den final asoshi asayatsü.

Asaya tenzük minute 81 buba nung box telung nung Dutch defender Stefanie van der Graagt teka agi ball nung kongshiba ajanga Mariona Caldentey-iba penalty metsüba nung Spain asoshi mezüingbuba goal agüja liasü.

Van der Graagt asoshi iba asayamung ya tatem alitsü aser lai minute 91 buba nung goal ka agütsüteta Wellington Regional Stadium nung terepranger nisung 32,021 alidak mapang apuloka asayatsüsa akum.

Jenjang toku buba nung aliba Dutch tsürtem ya küm pezü tejaklen France nung asayadang United States indang runners-up liasü aser iba asayamung nung parnok dak teimla liasü, kechiaser US, Germany, Canada aser Brazil tsükogo.

BILEMDANGANG

"Nai inyakba ajanga temelenshi alir ama inyangang."